



**HURIA KRISTEN BATAK PROTESTAN (HKBP)**  
**HKBP PURWOKERTO - RESSORT PURWOKERTO**  
**DISTRIK XVIII JABARTENGDIY**

Jl. Sarwo Endah VII, Purwokerto Kidul, Website : [hkbpwt.org](http://hkbpwt.org)  
Rekening Huria : Bank BRI 1792-01-002272-50-0



Pimpinan Jemaat : Pdt. Jetro Tampubolon (082398313912), Parartaon : St. ARH. Lubis (081225214579),  
Sekretaris Gereja : St. WHA Sinabutar (081392493304), Bendahara Gereja : St. L. Simarmata (085326809788)

**PARTORDING INI PESTA PARNINGOTAN**  
**ARI HAMAMATE NI TUHAN JESUS**  
**(JUMAT AGUNG)**



**TOPIK:**

**“TOS MA HOSANA”**

Jumat 18 April 2025

## **Joujou Tu Parsaoran:**

U : Hamu angka dongan sahuria, marpungu hita nuaeng di bagas joro on laho patupahon parpunguan Parningotan Hamamate ni Tuhan Jesus na pataridahon holong ni roha ni Debata na so halompoan tu hita jolma manisia pardosa. Taida ma induk ni haporseaonta na manaon haporsuhon dohot haleaon ala ni hita.

**H : Hita hian do na ingkon hona bura ni patik alai sude bura i nunga dituhuk Jesus, Anak ni Debata Parholong roha na so hatudosan i.**

U : Marhite parpunguantu di Parningotan Hamamate ni Tuhan Jesus on lam tangkas di rohanta naung dipaombun Debata rimasNa tu hita. Mansai balga asi ni rohaNa mida hita pardosa on. Marende ma hita :

### **1. Marende BE. No. 81 : 1 - 3 "Jesus Mual Ini Ngolungku" BL.185**

*♪♪* Jesus mual ni ngolungku Sipangolu tondingki

Ai dibunu Ho musungku ima hamatean i

Ho manaoni hamagoan patupahon hangoluan

Alani hupuji Ho tung marribu hali do

*♪♪* Haleaon insakhinsak reherehe tijur pe

Tali dohot pastappastap tung ditaonhon Ho sude

Paluahon au na pogos sian tangan ni sibolis

Alani hupuji Ho tung marribu hali do

-----*Jongjong*-----

*♪♪* Bugang sada tanggurungMu di na hona linsing i

Hamamalum ni buganghu na di rohangki do i

Ho do gabe binuraan au dapotan hangoluan

Ala ni hupuji Ho tung marribu hali do.

### **2. VOTUM – INTROITUS – TANGIANG:**

U : Marhitehite Goar ni Debata Ama, dohot Goar ni AnakNa Tuhan Jesus Kristus, dohot Goar ni Tondi Parbadia na tumompa langit dohot tano on. **Amen.** Sintua ni malim sisongon i do tama di hita, na badia, na so jahat, na so marlindang, na mambolat sian angka pardosa, naung gabe tumimbo sian angka banua ginjang. Na so pola ganup ari songon angka sintua ni malim i mamboan jumolo pelean taringot tu angka dosana sandiri, dung i taringot tu dosa ni natorop i, ai sahali do i diulahon, di na mamelehon diriNa Ibana. **Haleluya!**

**H : (Mangendehon): BE. No. 852 : 1 "HALELUYA HKBP (3X)" BL. 852**

*♪♪* Haleluya Haleluya Haleluya

U : **Martangiang ma hita!** Ale Amanami jala Debatanami! Parasiroha na sumurung do Ho di sude jolma manisia. Nunga dilehon Ho AnakMu, Tuhan Jesus Kristus Tuhannami, manaon haleaon dohot siak ni bagi, pola mate tarsilang, asa malua hami sian gomgomani ni sibolis. Sai parrohai ma hami mamingkiri panaonon ni AnakMu, asa maruli hami marhite sian i di hasesaan ni dosa dohot di haluaon sian hamatean paduahalihon, asa dapot hami hangoluan salelenglelengna marhitehite Tuhan Jesus Kristus Tuhannami, Anak haholongan ni rohaM. Amen

3. **Marende BE. HKBP No. 412 : 1 “NDI DI DOLOK ADUI” BL. 387**

♪♪ Ndi di dolok adui silang ni Tuhan i sap mudar sap tijur do i  
Jesus mate disi asa malum dibaen sude angka gondok roha i  
Dibaen i tung holong rohangki mida silang di Golgata i  
Hupasolhot diringku tusi dompak surgo pardalananhi

4. **PATIK :**

U : Tangihon hamu (Tatangihon) ma Patik ni Debata, i ma **Heber 12 : 2.** “Tabereng ma induk ni haporseaon i jala na paujunghonsa, i ma Jesus, na manaonhon parsilangan i, singkat ni las ni roha, tohapna i hian, so dietong i hailaon, gabe hundul di siamun ni habangsa ni Debata!”

*I do sahatna. Antong, rap mangido gogo ma hita sian Tuhan Debata!*

**U+H : Ale Tuhan Debata sai pargogoi ma hami mangulahon na hombar tu PatikMi. Amen.**

5. **Marende BE. HKBP No. 411 : 1 - 2 “Nang Pe Rara Dosamu” BL. 274**

♪♪ Nang pe rara dosamu ias dibaen mudarHu  
Nang pe rara dosamu ias dibaen mudarHu  
Na dapdap songon hasumba songon itak do  
Nang pe rara dosamu nang pe rara dosamu  
Ias dibaen mudarHu ias dibaen mudarHu

**(Jongjong)**

♪♪ SoaraNa manjouhon o pauba rohamu  
SoaraNa manjouhon o pauba rohamu  
Ai na asi do rohaNa sai dipio ho  
SoaraNa manjouhon soaraNa manjouhon  
O pauba rohamu o pauba rohamu

6. **MANOPOTI DOSA:**

U : **Tatopoti ma dosanta, martangiang ma hita!** Ale Tuhan Debata, Ama ni Tuhannami Jesus Kristus, Ho do Debata pargogo na so hatudosan, sitompa nasa na adong, paruhum na tigor, na manguhumijolma manisial! Na ro do hami tu joloM manopoti dosanami, angka na huula hami marhite sian pangalaosionnami di PatikMu, i ma marhite sian tubutubu ni rohanami na roa i, nang sian pangkationnami na so ture, ro di pangoloionnami di hisaphisap ni rohanami. Na tama situtu do hona uhum hami ala ni dosanami i, alai na tarsolsol bagi do hami nuaeng ala ni i. Asi ma rohaM di hami, ale Debatanami. Pardengganbasa jala Parasiroha do Ho ala ni Anak haholongan ni rohaM, Tuhan Jesus Kristus Tuhannami. Sai sesa ma dosanami saluhutna, jala suru ma Tondi Parbadia tu rohanami be, asa tarbahen hami mangoloi Ho di bagasan hatigoran dohot habadiaon, gabe sahat hami tu hangoluan na so ra suda, na pinarbagabagaM di angka na porsea di AnakMu, Tuhan Jesus Kristus, Tuhannami. Amen.

**(Musik angonangon... BE. No. 182:1...)**

**Bagabaga ni Debata taringot tu hasesaan ni dosa!**

Ala ni pangalaosionta do umbahen na tartullang Kristus, jala binahen ni hajahatonta do Ibana mabugang. Ampe tu Ibana pinsangpinsang parhitean ni hasonanganta, jala binahen ni bugangNa malum itahilala. Hasangapon ma di Debata na di ginjang.

**U+H : Amen.**

**(Hundul)**

**7. Marende BE. No. 88 : 1 + 4 “DI SURGO DO ALEALENTA”**

*1). Jesusku naung manobus ahu sai naeng haholonganku Ho*

*Tu dolok Golgata Ho laho Nionjar ni holongMu do*

*Hupuji nasa asiMi Alai gumodang holongMi*

*4). Bagas uhirhon tu rohangku PangkophopMi humophop au*

*Tusi ma togu pingkiranku Guru di Ho sambing ma ahu*

*Hupuji nasa asiMi Alai gumodang holongMi*

**8. EPISTEL:**

**U** : Tatangihon ma Hata ni Debata turpuk Epistel di Parningotan Ari Hahamamate ni Tuhan Jesus on, tarsurat di **Sakaria 9 : 11 - 17**, Ho pe marhitehite mudar ni parpadanonmu paluaonHu angka na tarbuang sian ho, sian godung na so marisi aek.

**H** : **Mulak ma hamu tu huta na gonting, hamu ale angka na tarrante na marpangkirimon dope! Gari sadari on Ahu mamaritahon hian: Silompit dua do pasuangenHu tu ho.**

**U** : Ai hira sior husintak Juda di ahu, jala huparade ia Epraim tu parporangan, jala husunggul angka anakmi, ale Sion, dompak angka anakmu, ale tano Gorik jala bahenonHu ma ho hira podang ni ulubalang.

**H** : **Jadi tarida ma Jahowa di atas nasida, jala ruar sumbiaNa, songon hilap, jala paluon ni Tuhan Jahowa ma sarune, jala marhitehon angka habahaba sian dangsina Ibana mardalan.**

**U** : Jahowa Zebaot mangondingi nasida, gabe suda panganonnasida jala luntakhononna angka batu ni ambalang; jala minum nasida jala marhariburon hira sian anggur, gabe gok nasida songon saolan pangurusan, songon angka suhi ni langgatan.

**H** : **Jadi di ari na sasada i lehonon ni Jahowa, Debatanasida ma tua tu nasida, songon tu parduan birubiru ni bangsona, ai angka batu ni tumpal do nasida, angka na gabe partonggol di atas ni tanona.**

**U** : Ai aha hinadengganna, jala aha hinaulina? Dahanon pasimbur magodang angka dolidoli, jala anggur angka na marbaju.

*I do sahatna. Martua do angka na tumangihon Hata ni Debata jala na umpeopsa.*

**U+ H: Amen.**

**9. Marende BE. No. 622: 1-2 “Mansai Nalnai Di Angka Partingkian” BL. 622**

*Mansai nalnai di angka partingkian sinondang ni silangMu Tuhanhi*

*Sian hatiuron na marsinondang holongNa na so halampoan i*

*Sude na bangso do marpanghirimon tu sondang ni asi ni roha i*

*Songon parluga na manghalungunhon parbinsar ni mata ni ari i*

*----- Jongjong -----*

♪♪ SilangMu Kristus tanda ni holongMu pahisar tondi na magopu i  
 Mangalononghon sasude dosangku mabaor tu laut asi ni rohaMi  
 Naung tubu hami gabe na imbaru na ni urasan sian dosa i  
 Ala mudarMu na ni usehonMu di Golgota di hamamateMi

**10. MANGHATINDANGHON HAPORSEASON:**

U : Tahatindanghon ma haporseaonta i, songon na hinatindanghon ni donganta  
 sahaporseaon di sandok portibi on. Rap ma hita mandok!

H : Ahu porsea di Debata Jahowa.... d.u *(Hundul)*

**11. K O O R: Ina/Parompuan; Remaja**

**12. TINGTING/Sunggulsunggul:**

**13. K O O R: NHKBP; Punguan Ama**

**14. Marende BE. HKBP No. 426 : 1--- "Tutu Na Mate Jesus" BL. 298  
 (P. Pelean Ia & Ib)**

♪♪♪ Tutu, na mate Jesus i humophop iba on?

Durus di hau parsilang i mudarNa i tongon

Songon i tutu songon i tutu

Umbaen na mate Jesus i siala au do i.

2. Tutu na mate Jesus i siala dosangki?

Na lao pasaehon utanghi dibaen holongNa i?

Songon i tutu songon i tutu

Umbaen na mate Jesus i siala dosami

*..Musik...*

3. Holom ni haholomon i, targantung Jesus i

Parholong, lambas roha i, tung ala dosangki

Songon i tutu songon i tutu

Umbaen na mate Jesus i siala dosami

4. Tama huhuphup bohingkon marsinggang di joloM

Mariluilu matangkong marningot basaMon

Songon i tutu songon i tutu

Umbaen na mate Jesus i siala au tongon

*...Musik...*

5. O Jesus, sai urupi au, asi ma rohaMi

Dison do au, sai togu au, naeng saut tu lambungMi

Songon i tutu songon i tutu

O Jesus sai urupi au saut ma tu lambungMi

**15. J A M I T A: Markus 15 : 33 - 41**

**16. BE. HKBP No. 86 : 1 - 5 "Silang Na Badia I" BL. 67 *(Pelean II)***

♪♪ Silang na badia i Ho do lombulombungki

Maralohon dosa i dohot pandelea ni

Di sude sitaonon i Ho ma lombulombungki

♪♪ Nasa na huula i ndang tau hasonanganhi  
Nang ringkot pe rohangki pola ro nang ilungki  
Holan asi ni rohaM pangurupi o Tuhan

-----Musik-----

♪♪ Ro do au nuaeng tu ho sai palambas ma rohaM  
Nunga pola mate Ho ala asi ni rohaM  
Jangkon au na dangol on sai ulosi tondingkon

♪♪ Dosa patundukhon au ho ma mangondihon au  
Ramun situtu do au mudarMi mamuri au  
Na pogos dangol au on Ho ma artangki tongtong

-----Musik-----

♪♪ Silang na badia i Ho do lombulombungki  
Molo puas hodokhi di na suda bohalhi  
Di sude sitaonon i Ho ma lombulombungki

## 17. MARULAON NA BADIA (PERJAMUAN KUDUS)

- ✓ Holan naung manghatindangkon haporseaon (Sidi) do na boi mandohoti Ulaon na Badia.
- ✓ Na so Malua dope hundul ma di inganan na be.
- ✓ Diparade ma Pelean marulaon Na Badia.

### 1). Marende BE. No. 179 : 1-2 “Adong do sada mual I”

1). *Adong do sada mual, i di na mardosa i*  
*Mansai denggan do mual i, pasonang rohangki.*  
2) *Aek mual na badia i, i ma di Jesus i*  
*Di sesa do tihasta i, dibuat arsak i.*

### 2). Agenda HKBP:

### 3). Marende BE. 153:1 “O Jesus naung sineat”

*O Jesus naung sineat di hau na pinarsilang.*  
*RohaM tongtong daulat nang uju Ho tarhilang.*  
*Marutang hosa hami ditaon Ho dosanami. Asi rohaM O Jesus*

### 4). Agenda HKBP Padirihon Parpadanan Na Badia

Dibuat Tuhan Yesus... d.u

**Pdt:** Antong ro ma hamu, nunga rade sude ! Ida jala dai hamu ma denggan basa ni Debata.

### 5). Marende: ( Huhut Manganhon Parpadanan i ).

#### a. Ende Huria BE. No. 227:1-6 “Jesus Ngolu ni Tondingku”

*Jesus ngolu ni tondingku, Hodo haporusanki*  
*Gok di Ho na ma diringku, ro di nasa langkaki*  
*Lam tangkas ma patuduhon, tu au on panghophopMi*  
*Asa i huhalungunhon, hot ma au di lambungMi*

*Jangkon au baen siseanMu Na girgir tu podaMi  
 Sai surdukkon ma tanganMu Asa tong hutiop i.  
 Tangkup au Jesus Tuhanku Tiop au mansai gomos  
 Asa unang runsur pathu Sian dalan na tingkos  
 Raphon Ho do au mangalo Dosa dohot hisaphi  
 Ai sumurut do pangago Anggo Ho di lambungki  
 TondiMi sai tong paian Di au on tinobusMi  
 Tung patau ma au manean PinarbagabagaMi*

**b. BE. No. 699:1... "Singkop Do Asi Ini Roham"**

- 1. Singkop so asi ni rohaM tu au na dangol on,  
 Na lilu ahu nahinan nuaeng jumpang do.*
- 2. Di na hutanda dosangki, gok biar rohangki,  
 Alai alani asiMi, mardame rohangki.*
- 3. Didalanki na rahis I, gok mara ngolungki,  
 Ala pangurupionMi, malua tondingki.*
- 4. Hutiop bagabagaMi, dipardalananki,  
 Ho Tuhan lombulombungki, diparaloan i.*
- 5. Nang busuk pe pamatangki, diparbandaan I,  
 PaheheonMu sogot au, tu surgo bongot au.*

**c. BE. No. 452:1-4 NA RO PANDAONI BOLON**

*Na ro pandaoni bolon i, i ma Tuhanta Jesus Jesus  
 Didaoni marsahit i, hisar dibahen Jesus Jesus  
 Reff: Uli ni barita i, las ni roha bolon i  
 Sai dipuji rohangki Jesus, Jesus, Jesus  
 Tung sae do dosa i sude, ai nunga mate Jesus  
 Nandang jujuronNa i muse, parholong roha Jesus. Reff: Uli ni...  
 Na hansit na di rohangki dibuat Tuhan Jesus  
 Antong, hamuna donganki, hatop ma ro tu Jesus. Reff: Uli ni...  
 Di ari haroroNa i boi idaonku Jesus  
 Suksuk las rohangki disi, dung domu au tu Jesus. Reff: Uli ni...*

**d. BE. No.673:1-4 ADONG DO SADA MUAL I**

- 1). Adong do sada mual I na sian Tuhan I,  
 Durus sian bugangNa I di hau parsilang I,  
 Di hau parsilang I, di hau parsilang I,  
 Durus sian bugangNa I di hau parsilang i.*
- 2). Parjahat na dilambungMi taruli sian I,  
 Nang au pardosa songon I, ias diburi I,  
 Ias diburi I, ias diburi I,  
 Nang au pardosa songon I, ias diburi.*
- 3). Ai na margogo do tongtong mudarNa na use,  
 Manobus sasude na ro, na gok dosana be,  
 Nang gok dosana be, nang gok dosana be,  
 Manobus sasude na ro nang gok dosana be.*

4). *Dung na hutatap Tuhan I manaon na bernit I,  
Sai pujionku holongMi, saleleng ngolungki  
Saleleng ngolungki, saleleng ngolungki,  
Sai pujionku holongMi, saleleng ngolungki.*

**e. Ende Pangujungi: BE.No. 9 : 1“Hupuji holong ni rohaMu  
huria jongjong**

*Hu puji holong ni rohaMu, O Tuhan Jesus, Rajangki!  
Tu Ho hulehon ma tondingku, ai i do pinangidomi  
Hu halupahon ma diringku, mamingkir holong ni rohamu.*

**18. TANGIANG PANGUJUNGI (Pelean, Ari Hamamate, Ale Amanami, Pasupasu):**

***(Mangaso sangombas andorang so diuduti tu Ulaon Na Hohom)***

**ACARA ULAON NA HOHOM SINGKAT NI PUKUL 14.00 WIB:**

**1. Marende BE . No. 76:1-2 “Sada nama sangkap ni rohangku”**

*1). Sada nama sangkap ni rohangku di sandok portibi on.  
Ndang tagamon na so las rohangku, molo jumpang au inon.  
Naeng ma sai ingoton ni rohangku, na binaen ni Jesus tu tondingku.  
Uju pinorsanNa i, saluhutna dosangki..*

*2). Ingkon sai Ibana ingotonku, uju na tarpajal i.  
Tu hau pinarsilang ginantungkon, sai mabaor mudarNa i.  
Ai humophop au ditaon uasNa, asa dohot au muse upaNa.  
Ai ditatap do au on, di pandokNa: “Nunga sun !”*

**2. Agenda HKBP**

Marhite Goar ni Debata Ama dohot Goar ni AnakNa Tuhan Jesus Kristus dohot Goar ni Tondi Parbadia. Amen.

*Na tama do birubiru naung tarbunu i manjalo hagagoon dohot hamoraon dohot hapistaran dohot sahala dohot hamauliateon hasangapon dohot pujipujian. Amen.*

**Martangiang ma hita:** Ale Amanami jala Debatanami: Parasiroha na sumurung do Ho di sudejolma manisias. Nunga dilehon Ho AnakMu, Tuhan Jesus Kristus Tuhannami, manaon haleaon dohot siak ni bagi, pola mate tarsilang, asa malua hami sian gomgomon ni sibolis. Sai parrohai ma hami mamingkiri panaonon ni AnakMu, asa maruli hami marhite sian i di hasesaan ni dosa dohot di haluaon sian hamatean paduahalihon, asa dapot hami hangoluan salelenglelengna marhitehite Tuhan Jesus Kristus Tuhannami, Anak haholongan ni rohaM. Amen

**3. Marende BE . No. 83:1 “Na lao do birubiru i”**

*1). Na lao do Birubiru i Mamorsan angka dosa  
Ni nasa hajolmaon i Di benget ni rohana  
Diporsan do sahitta i Di lehon do DiriNa i  
Tu tangan ni pamunu Ditaoni do na bernit i  
Ro di na tos hosaNa i Didok : Naeng porsanonku.*

#### 4. Manjaha Buku Golgata HKBP

*Tung ise ma nuaeng porsea di jamitanami? Jala tangan ni Jahowa, tung ise ma naung tumandasa? Ai simbur do Ibana tubu songon tumbur di adopan ni bohiNa, jala songon tunas sian tano na mahiang. Nandang adong hinauli ni rupaNa manang hamuliaonNa: ia huida hami Ibana, ndang adong rupaNa umbahen sihalomohononhon Ibana. Dileai jala dipasidingjolma do Ibana, baa na somal mangae pardangolan dohot sahit Ibana, pola ditabunihon halak bohina maradophon Ibana, dibahen leana, jadi ndang pola hurajumi hami Ibana.*

Tongon do angka sahitta diusung Ibana, jala angka pardangolanta diporsan; alai anggo rohanta mandok: Debata do maminsang, mamungkul dohot pasipal Ibana. Hape ala ni pangalaosinta Ibana tartullang, binahen ni hajahatonta Ibana mabugang. Ampe tu Ibana pinsangpinsang parhitean ni hasonanganta, jala binahen ni bugangNa malum itahilala.

*Luhut do hita lilu songon birubiru, ganup masitondong dalanna be, alai hajahaton ni hita sudena dihonahon Jahowa tu Ibana. Dipasipal pe Ibana, sai manaonnaon do anggo Ibana, ndang manang manghuling pamanganNa, songon birubiru do Ibana na tinogu tu pamotongan, jala songon anak ni birubiru na hohom maradophon si gusting ibana, tung na so dibuha do pamanganNa.*

#### 5. Marende BE . No. 152:1 “Jesus Na mamorsan”

*1). Jesus na mamorsan dosa ni portibi on, pangolu hami.*

*Jesus na marmosan dosa ni portibi on, pangolu hami.*

*Jesus na mamorsan dosa ni portibi on, sai pasonang hami, Amen, Amen, Amen.*

#### 6. Manjaha Buku Golgata HKBP

Dung i dipasahat ma Jesus tu nasida asa diparsilanghon. Jadi laos Jesus sandiri do mamorsan hau pinarsilang i. Laho manogihon Ibana, disoro nasida ma sahalak, si Simon sian Kirene goarna, na ro sian ladangna, tu ibana ma dipaporsanhon hau pinarsilang i, paihutihut Jesus. Torop do halak na mangihuthon Ibana, nang angka boruboru na mananangisi jala na mangandungi Ibana jadi didompakhon Jesus ma nasida, ninna ma. Hamu angka boru Jerusalem, unang ma Ahu tatangisi hamu, dirimuna dohot anakhonmuna ma!

*Ai na ro ma angka ari sogot, dohononna ma disi: Martua ma angka na hol, angka ina na so dung tubuan jala na so dung panarusan! Disi ma pungaon ni halak mandok tu angka dolok: Tinggangi ma hami! Dohot tu angka tor: Huphupi hami! Ai molo songon i pambahennasida tu hau na rata, aha ma tagamon masa tu hau naung masak?*

#### 7. Marende BE . No. 520:2 “Partangisan Do Hape”

*2). Nandang na tarpasiding be anggo hamatean i.*

*Ingkon do dibolus be, di na lao tu surgo i.*

*Sihirimon ni rohanta, hangoluan sogot i.*

*Tau pangapul di rohanta. Angka na porsea i.*

#### 8. Manjaha Buku Golgata HKBP:

**“Ale Amang marpamuati ma rohaM mida nasida, ai ndang dioboto nasida na binahen nasida i”**

Alai ditogihon dope dua halak nari parjahat, sipamateon rap dohot Ibana. Asa dung sahat nasida tu dolok na margoar Golgotha, lapatanna Partangkurahan, diparsilanghon ma Ibana disi rap dohot angka parjahat i. Na sada tu siamunNa, na sada nari tu hambirangNa. Jadi didok Jesus ma:

**Ale Amang! Marpamuati ma roham mida nasida, ai ndang diboto nasida na binahennasida i.**

*Alai disurat si Latus ma sada boaboa, dipalohot ma tu hau i. On do hatana: Jesus halak Nasareth, Raja ni Jahudi! Jadi torop ma Jahudi na manjaha boaboa i, ai jonok tu huta i do pamajalan ni Jesus, jala tarsurat do i di hata Heber, di hata Rom dohot di hata Gorik. Dung i didok angka Sintua ni Jahudi ma tu si Latus: Unang surat i, Raja ni Jahudi; alai na nidokNa i ma nian: ahu do Raja ni Jahudi! Dung i dialusi si Latus ma; Na husurat i, naung tarsurat do i! Asa dung diparsilanghon angka soldadu Ibana, dibuat nasida ma angka abitNa, diparopat ma i, di ganup soldadu sabagian be, dunghon ni sampesampeNa. Anggo sampesampe i ndang marpanjaruman, na ditonun saming do i, gabe masipandohan ma nasida: Unang ma taribahi on, martondung ma hita taringot tusi, manang di ise i. Jadi jumpang ma surat i na mandok: Dibagi nasida do abitHu, tondung do didabu taringot tu sampesampengKu.*

**9. Marende BE . No. 77:1**

**“Hamu saluhut halak”**

*1). Hamu saluhut halak, ro ma hamu manatap, hangoluanmu on.*

*Na gantung di parsilang tumahan hamatean, naeng ingotonmu i tongtong.*

**10. Manjaha Buku Golgata HKBP “Sadarion ho rap dohot Ahu di Paradeiso”**

Alai dilealeai angka na mamolus i ma Ibana, angka dipaelengeleng uluna mandok: E, Ho, na mangalohai Joro i jala pajongjonghonsa di bagasan tolu ari! Palua diriM. Molo na tutu Ho Anak ni Debata: Mijur ma Ho sian hau pinorsilang i! Suman tusi do pangaleai ni angka sintua ni malim, sibotosurat dohot sintua ni bangso i, ai didok be: Ia na asing dipalua, diriNa so tarpaluasa, Raja ni Israel do Ibana. Antong mijur ma Ibana sian hau pinorsilang i, asa porsea hami di Ibana. Molo tutu naung dihaposi Debata, antong I ma paluahon Ibana nuaeng, molo na lomo rohaNa, ai ninna do: Anak ni Debata do Ahu.

*Laos songon i do pangaleai ni panamun i, na rap diparsilanghon dohot Ibana. Ai ndada Kristus i Ho? Palua ma diriM nang hami antong! Alai dialusi donganna i do ibana, dipinsang ma, ninna ma: Ndang dihabiari ho hape Debata, atik pe rap hona uhum hita? Uhum na tigor do na tu hita, ai tajalo do upa ni pambahenanta; alai anggo Ibana, ndang adong diula na so ture. Laos ninna ma: O Jesus, ingot ahu, ia dung sahat Ho tu harajaonMi! Gabe ninna Jesus ma mandok ibana. Situtu do na Hudok on tu ho: **sadari on do ho rap dohot ahu di paradeiso!***

**11. Marende BE . No. 29: 1**

**“Ima tingki hasonangan”**

*1). I ma tingki hasonangan Molo Ho o Jesuksi*

*Pinahusor di pingkiran Ro di asiastiMi*

*Molo Jesus ni luluan Holan Jesus sinangkapan*

*Tingki na lehet ma i Na pasonang roha i.*

## 12. Manjaha Buku Golgata HKBP:

**“Ndi ma, inang, Anakmi!... Ndi ma, inangmi!”**

Dung i jongjong ma di lambung ni Jesus na di hau pinorsilang i, inaNa dohot paribanNa dohot si Maria ni si Kleopas dohot si Maria Magdalena. Anggo Jesus dung diida disi inaNa i dohot sisean haholongan ni rohaNa di lambungNa, didok ma tu inaNa: **ndi ma, inang, anakmi!**

Dung didok ma tu sisean i: **Ndi ma, inangmi!**

Jadi olat ni i ma dijangkon sisean i ibana tu jabuna.

## 13. Marende BE . No. 298:1-2 “Dilambungmi o Jesushi”

1). *Di lambungMi o Jesuski Tung na mardame roha i*

*Maporus holsoholsongki Lam tu tiurna rohanki*

*Lam ganda las nang gogongki Dung Ho hutanda Jesuski.*

2). *DilambungMi o Jesuski Ndang be margogo musu i*

*Lam talu do na jahat i Lam monang do na danggan i*

*O tua ni naung domu i Tu Tuhan Jesus Rajangki.*

## 14. Manjaha Buku Golgata HKBP:

**“Eli, Eli, lama sabachtani, Ale DebatangKu, DebatangKu, boasa tung tadinghononMu Ahu? Mauas Ahu.**

*Olat ni hos ni ari ro di pukul tolu, holom ma sandok tano on. Alai tar di pukul tolu, dipangiar Jesus ma soaraNa, diangukhon ma: eli, eli, lama sabachtani; ale debatanku, debatanku, boasa tung tadinghononmu ahu?*

Alai umbege i ninna na deba sian angka na jongjong disi ma: Na manjou si Elias do i. Jadi dung diboto Jesus, naung marujung saluhutna, asa jumpang natarsurat i, ninna ma: **MAUAS AHU!**

## 15. Marende BE. No. 449:1-2 “Sai solhot tu silangMi”

1). *Sai solhot tu silangMi, Jesus Ingananku.*

*Mual na mabaor disi, I ma I nu mon ku*

*SilangMi, Tuhanki I ma pujionku,*

*Paima sogot sahat au, I endehononku,*

2). *Lao ma au tu silangMi, I haporusanku.*

*Sai asi ma rohaMi unang tulak ahu.*

*SilangMi.....*

## 16. Manjaha Buku Golgata HKBP: Nunga Marujung

*Jadi adong ma disi isian ni tuak na asom, dibutongi nasida ma limut tu bagasan tuak na asom i, dipalohot ma i tu sada tolong laho manurdukhon tu pamanganNa. Jadi dung dijalo Jesus na asom i, ninna ma: Nunga marujung!*

Aha do na marujung ? Nunga marujung angka ulaon dohot paraloanna i. Nunga marujung nang silangna i. Nunga marujung sitaononna i. Andorang so dipaunduk dope simanjujungna i, nunga mulai mandele mata ni ari i marsinondang, gabe mangholom ma sandok tano on.

## 17. Marende BE. No. 353:1+4 “Di surgo hasonangan i”

1). *Di surgo hasonangan i Ingan na dumeggan i*

*Tusi naeng laho muli au Asa rap dohot Jesus au.*

4). Na porsuk nang na bernit pe Mansohot ma di surgo i  
Disi soada dosa be Mansohot nasa jea pe

**18. Manjaha Buku Golgata HKBP:**

**Amang! Tubagasan TanganMu hupasahat TondingKu".**

*Ndang tarpaida-ida mata ni ari i be Jesus na sai gantung i. Songon na maila mata ni ari i marnida bohi ni na sai marsinondang nasailaon. Disonggak sinondang ni asi ni roha ni Jesus i do sinondang ni mata ni ari i. Ujungna gabe dipaholom mata ni ari i ma dirina. Gabe songon na alang so tarida nama Jesus di silang i.*

*Ale mata ni ari, boasa so mangkidop be ho? Tagamon naung ditatap ho do na so mangkidop be simalolong ni Jesushi? Nunga mampirong humaliang. Disi ma dipagogo, dipangiar Jesus soaraNa ninna ma: ALE amang! tu bagasan tanganmu ma hupasahat tondingku. Jadi dung didok i, dipaunduk ma uluNa, tos ma hosaNa.*

*Tapahohom ma, rohanta jala martangiang be ma hita di bagasan rohanta.  
(Jongjong ma hita sude).*

**... Manghuling ma giringgiring pitu (7) hali marholangholang ...**

**19. Marende BE . No. 88:2+4 "Jesus naung manobus au"**

*2). Tarsolsolbagi do rohangku paidaida dangolMi*

*Marningot sasude dosangku Ai i do na tinaonMi*

*Hupuji nasa asiMi Alai gumodang holongMi*

*4). Bagas uhirhon tu rohangku pangkophopmi humophop au*

*Tusi ma togu pingkiranku guru di Ho sambing ma ahu*

*Hupuji nasa asiMi alai gumodang holongMi.*

**20. Manjaha Buku Golgata HKBP**

*O Jahowa Debatangku, ndang dodoan ni rohangku, las ni roha I disi*

*Nunga tos hosa ni Jesus i. Nunga marujung be dibahen Ho ale Tuhan. Alai ida ma, nunga laos godang naung jumolo borhat, mangihuthon Ho sian bagas ni halak Kristen di portibi on. Sian ruas ni Huria on pe, nunga torop na laho mandapothon Ho. Ingot ari hamamatem ninna angka na porsea na parjolo i. Pasolhot ma hamamatem amang, inang tu hamamatem ni Jesus i. Ia hamamatem ale Jesus, gabe hamamateanhon do i hape. Ia hamamatem ale Jesus, gabe pintu hamasuhanku do i tu surgo hasonangan i. Ai marhite i do diparade ho inganan na sonang i.*

**21. Marende BE . No. 334:3 "Nasa jolma ingkon mate"**

*3). Jesus Kristus nunga mate Ala ni mangolu au*

*Singkop tua diparade I pe las rohangku lao*

*Manadingkon pardagangan Mandapothon hasonangan*

*Mandapothon Jesuski Ai malungun au tusi.*

**22. Tangiang ale Amanami..... Amen.**